

Hip-hop, chanzuns d'amur e Linard Bardill?

Gea, quai è pussaivel! Ina tura tras differents stils e lura vinavant en il mund da film

CUN LINARD BARDILL HA
CLAUDIA CADRUVI (ANR) DISCURRÌ

■ **Bunamain 15 onns ha el stui rimnar experientscha enfin ch'el ha ristgà d'edir ina cd be cun chanzuns d'amur. Uss è la cd da Linard Bardill vegnida sin fiera.** Ella sa numna «1 Traum & 12 Lieder». Spezial n'è betg sulet ch'il chantatur fa ina cd deditgada be a l'amur, nov è era la musica. Davent dal stil dals onns 40 cun Glenn Miller enfin tar hip hop emprova Bardill ora dal tut. Ensemen cun auters musichers svizzers sco *Roman Camenzind* e *Dodo Hug* gartegia l'experiment.

Il «Tages-Anzeiger» numna Vos il meglier autur da chanzuns d'amur da lieunga tudestga. N'essas Vos betg gia memia vegl da scriver e chantar chanzuns d'amur?

Linard Bardill: La chanzun d'amur è adina stada mia chanzun preferida. Ma fin uss n'hai jau betg gi il curaschi da far ina entira cd cun chanzuns d'amur. A mai para quai insatge dal pli grev ch'i dat. Per scriver chanzuns d'amur van ins ina via graschla tranter l'intim ed il general. I n'astga dentant betg daventar «kitsch» penibel. Far in program da concert be cun chanzuns d'amur è fitg difficil.

En sasez èsi plitost da dumandar daco ch'jau n'hai betg fatg quai pli baud? La resposta è: Jau hai duvrà l'experientscha da 15 onns concerts e far chanzuns.

Nus vivin en in temp nua ch'i dovra amur. Il clima general da la societad è fraid. Perquai na lev jau questa giada betg confruntar la glieud cun in tema politic mabain cun in tema davart la relaziun tranter ils umans. E qua ma stat l'amur a cor: Jau viv da l'amur.

Sin la nova cd chantais Vos en in lieu: «Es kichert mis Knü und es jodlet mini Seel.» Co vegnis Vos sin da quai?

La poesia sto ir novas vias. P. ex. sche jau chant «Ti es mes curtin ed jau sun la flur» n'è quai en sasez betg insatge nov. Nov è be ch'in um di ch'el saja ina flur. Normalmain è adina la dunna



En in tempo rasant dat il chantatur rumantsch e tudestg ora cun novas cd's. Gist uss hai dà ina be per l'amur.

MAD

la flur ch'ha da spetgar sin l'avieul. Jau na scriv betg poesias ermeticas – quelas poesias che be in per intellectuals chapeschan. La sgnocca cun il schanugl che ri hai jau fatg perquai ch'jau na crai betg ch'ins balla be cun il corp sut, mabain jau saut cunzunt cun la schanuglia. Impurtant è simplamain ch'ins sa deliberescha cun las poesias e fa liber cun ellas in champ per ils sentiments.

La chanzun «Jau sun il luf» ha in tut auter stil. È quai perquai che Vos chantais quella ensemen cun Dodo?

Jau leva ir ina via ch'jau na sun ì enfin uss. Jau hai empruvà ora stils da musica dad auters decennis. La chanzun dal «luf» cun Dodo Hug ha il stil dals onns 40 cun Glenn Miller. La chanzun «Orpheus» è alura il hip hop dad oz, cun il musicher Roman Camenzind da la avantgarda svizra. Lura hai tipicas chanzuns dals onns 60 u era da disco. Igl è stà per mai ina tura d'orizont atras ils stils ils pli divers.

Èsi betg immens cumplitgà da registrar ina cd cun tantas furmazions differentas?

Questa cd è stada per mai la pussaivladad da sunar cun musichers excellents che sunan auters stils. Jau hai vulì savoir sch'jau poss far il viadi tras ils differents stils da musica e restar adina anc

il Linard Bardill. Jau hai fatg differentas cd's cun be in stil. Questa giada hai jau fatg ina cd cun ils stils dals ultims decennis. Sche quai è gartegià alura grazia a la participaziun dad immens buns musichers.

Ma cun tants differents musichers na vegni betg ad esser pussaivel da far ina turnea?

Bain. Cun quatter u tschintg musichers sun jau bun da far pli u main questa cd. Nus avain l'intenziun da far tschintg u sis concerts la stad ad open airs: Philip Küng al bass, Walter Keiser a la batteria, Thomas Fessler sco ghitarist e Peter Wagner al keyboard. Cun questa furmaziun pon ins far bunamain tut.

E tge datti sco proxim da Linard Bardill. Puspè ina cd u in cudesch?

Gist uss è vegnì ora ina cd per uffants. Quella ha num «Gimli der Zwerg». Las proximas dumengias la damaun vegn ella era emessa en il Kinderclub da DRS 1 a las 8.30 cura ch'ils creschids dorman anc. In auter project ch'jau hai è in film dal qual jau hai scrit il scenari. Il reschissur è Kaspar Kasic da Turitg che fa uschiglio films documentars. I vegn a dar in sort roadmovie che sa splega era en Val Müstair. Igl è propi mes tema preferi: I sa tracta d'ina istorgia d'amur.